

lichen Mutter geboren/vnd daß solcher Mensch sey warhafftiger Gott/als ein ewige vnzerrennliche Person auß Gott vnd Mensch worden / habe gelitten vnter Pontio Pilato/gecreuziget/gestorben vnnnd begraben: Vnd derselbige Gottes vnd Mariæ Sohn / vnser Herz Jesus Christus habe für vns arme Sünder gelitten/ sey für vns gecreuziget vnd gestorben / damit er vns von Sünden/Todt/Teuffel/vnd vom ewigen Zorn Gottes durch sein vnschuldig Blut erlöset hat/von Todes Angst/der des Todes Angst selbst erlitten/vñ die HELL selbst empfunden/vnd vberwunden hat / auff daß wir mit Gott versöhnet/auch aller Freud ein Herz würden.

Wir glauben auch / daß wir ohne dieses sterben / oder diesen Todt des Sohns Gottes/weder mit Wercken/noch mit eygener Heyligkeit/die Gnade Gottes/vnd die Seeligkeit erlangen mögen. Wir glauben auch/daß Jesus Christus vnser Bruder vom Todt erstanden vmb vnser Gerechtigkeit willen/daß vns nichts mehr schaden kan: Dann wir bekennen / daß wir des ewigen Todts sterben müsten / wo Christus Jesus vns nicht zu hülff kommen were/vnd vnser Schuld vnd Vermaledeyung zum ewigen Todt/ als ein vnschuldiges Lämblein auff sich genommen hätte/für vns durch sein Leiden bezahlet/vnd für vns die Maledeyung worden were. Wir glauben/daß er noch täglich für vns stehe / vnnnd bitte als ein getrewer barmherziger Bischoff vnserer Seelen für vns. Wir glauben / daß Christus Jesus mit Gott zu gleich alle Ding regiere/ond erfülle alle Ding/auch gewaltig seye im Himmel vnd auff Erden/vnd vnter der Erden/vber Todt vnd Leben/vber Sünd vnd Vngerechtigkeit. Derselbige König vnnnd Herz wirdt vns vorgehen/in vnserm Leiden vnd Sterben für vns streiten vnd kämpffen/damit wir sampt ihm ein Herz werden/vber alle vnser Feind immer vnd ewiglich. Wir glauben auch/daß der gecreuzigte Jesus zukünfftig werde seyn am jüngsten Tag/vnd alle die richten vnd verdammen/so nicht in ihn geglaubet haben: Vns aber mit den Glaubigen behüten für dem gestrengen Vrtheil der ewigen Verdammnuß/vnd zu vns sagen/Kommet her/ ihr Gebenedeyten meines Vaters/ererbet das Reich/das euch bereitet ist vom Anfang der Welt.

In diesem andern Theil vnser Christlichen Glaubens sehen wir/wie die Gottheit hat leiden müssen / das menschliche Geschlecht an sich zu nemen/oder an sich zu bringen/ so er vns anderst hat wöllen erlösen. Dann der Geist ist Corporalisch worden/hat den reinen Körper an sich genommen/von einer reinen Jungfrawen / die ohn alle Mackel ist gewesen: Sie hat vns geboren den Sohn Gottes / welcher auch rein ist / vnd nie keine Sünd gethan hat / auch nie kein Berrug in seinem Mund erfunden worden. Sollten wir Verdampfte nun selig werden/ so müste ein Vnschuldiger für die Schuldige sterben/